

恩

餘

堂

輯

稿

恩餘堂輯稿卷第三

孫男邦疇編校

古體詩

雜詩五首

結廬依澹岡山容變朝夕陟之六七里夷坦少荆
棘沙輭土膏肥荷鋤有餘力種瓜別畦壟種豆補
阡陌日暮歸且吟溪鳥雙飛白杯酒對親族縱談
無諱匿他時事遠遊念此恐難釋

藝蘭得馨香藝棘得刺螫人生各自召物性固難
易况乃麻扶蓬白沙與泥黑始焉不能慎棄去邢
復得友不出閭巷但取延三益持此向天涯前途

渺無極行求嘉樹陰不就惡木息

鳴蟬翳高樹吸露含餘清蜨蛄抱冀丸對面日營
營所性各有定大矣造物生二蟲又何知俛仰時
序更達人冥其心靜觀周物情蟬固不宿飽蜨亦
自謂馨彼此不相喻因之得無爭

種菊三兩畦爛漫作重九敢效陶淵明籬邊來送
酒輕紅與粉白五色紛雜糅近更貴洋種菊譜未
曾有或如桃杏嫁介以蕭艾友昨夜秋霜穠衆艷
變深黝菊以黃爲正我聞東坡叟

泰山高萬仞俯瞰見日月黃河天上來千里駛不

絕身無高風翼遇之多隕越胡爲此不平乃向天
壤設觸以康回頭銜以精衛舌劃然泰山崩填將
河水竭世路見平坦造物應嘉說

河口水淺易小舟至玉山

冬乾水見底石長山過河遊子易輕楫榜人欲棹
歌招來五小艇棄置兩巨舸攜衾割臥具析箸檢
食籬問名是舸子最宜高灘過底窄剝蚌胎首銳
拋龍梭置足先動搖扣舷愁傾頗開船入石罅壓
篷峰嵯峨拘繫在籠鳥偪仄負殼蝸倏穿夾巷出
畏向陡壁磨丁丁點屐齒一一鍼蠡窠有時石障

水濺落珠翻荷篙屈柁橫側器呶千聲訛脫禪袒
露臂下赴清流波頭穿雙繩孔手挺八尺柯負水
夾左右一譁肩相摩曲躬再命僂凍面三爵酖誰
言百石舟藉此兩力馱冰寒易皸瘃足僵誰噓呵
人生誠艱難所遇多坎軻往來忽相直百步先鳴
鑼嘔啞柔櫓撥聯綿長簷拖下灘電睽閃上灘車
坡坳瞥眼便已過疾如飛鳧鷗彼此一失手迸裂
無延俄鉛山達玉山五日尙蹉跎迴思估客舟艤
幢連艣艤江行日千里打鼓驚龍鼉到此行不得
櫛比維枻戩日日閒坐看急漿凌盤渦小大各有

用遲速理則那不見舸子船索直三千多

丁貞女詩

婉婉幽谷蘭
靡澤中蕙同生
不同植感以芬芳
氣秋風先時來
嘉卉倏顛顛蘭生
獨亭亭雪霜何
所避

螺贏負螟蛉
辛勤營堦戶
巢鳩乳雀鷺
飛鳴繞高樹
慈烏尾畢逋
孤雛失中路
杜鵑口流血
夜夜不得住

未仕死國難
草澤奇孤忠
未婚守苦節
其心與此同
後儒執禮斷
尺寸衡顛蒙
自盡吾心耳
何必皆

中庸

竹垞作原貞西河禁守志二說各不同緣情可起
義夫死弔以斬聖人垂禮制苟同道路人安得死
生淚

以夫未成婦以子未成母獨抱一寸心凜此冰霜
守夷齊亦匹夫范張爲死友我作貞女詩以告千
載後

日晷扇

周官肇土圭漢志紀浮箭星中候旦宵日景驗賓
餞作者代云殊後來巧各擅銅晷天健行蓮漏水

至洊表宜伊帶垂鐘以自鳴銜誰通周髀學又寄

聚骨扇翦紙義車犇裁統媧石鍊三角線宛呈一

象限猶羨標圖法璣衡界畫命豪研廿四氣均平

二六時隱現三分而損一八位以次嬪

圖起卯盡戊不列夜

刻卯戌初進退冬夏至後先橫羅磚影移

橫求初正凡八

行縱布琴徽薦

縱求節氣凡十三行

磊磊瑤星聯纍纍寶珠

穿紋依摺疊斜占用啟閉便畫表準羸縮占度區

寓縣對爾出當心持之半遮面孤擎懸帆敲卓立

倚蓋莫歛爾落寸陰朗然悟添線出入隙駒馳動

搖磨螳旋車翻半輪仄繩繫隻手援收如箭錯捫

張似弧空卷清風招欲來陰雨看不見障塵桑榆
低傾陽蒲葵賤秋節不須悲夜合難爲善用逐炎
涼殊道隨頃刻變測月貫象環相風轉銅片誰知
懷裏物免使春旻眩持贈惜陰陶舉似談天衍歌
翻班姬行術補京房傳

曹和仲

羣玉

秋林讀書圖

少年多讀書如春感枯槎東皇所煦燠百節皆萌
芽旣壯多讀書如夏草木長雨露饒漑濯千章森
莽莽問君胡爲爾寄意在秋林秋林多蕭瑟何以
慰遐心吁嗟我與君託誼在肺腑爲君廣一言君

意或有取昔時同隊魚同日著慈裾君方志學歲
我纔弱冠初奄忽十八載分飛各南北昨來會東
華都非故顏色澹岡一魁阜獻原高崔嵬各有讀
書處蛛網生塵埃胸無萬卷淫塵有千斛積及茲
壯盛年相期皆努力不見蒲與柳託根苦不深秋
氣來撼撼未霜早蕭慘不見松與栢培植力已厚
惟其能耐秋所以凋獨後人生七十稀其中分四
時三十已踰半旣夏望秋期願君爲喬林千霄還
蔽日不願爲散木春華秋不實相送成贈言此意
不可捐不然一幃畫過眼如雲烟

放雉

安禪鵲巢頂苦戰鳩出井此心一動時物有幸不
幸莊言樊澤殊孔悅山梁警不忍絳刀机相將脫
囹圄齋閒園圃荒地僻榛灌迴條條困未蘇泄泄
决一騁豈有情去留各視力衰猛鑄印龜何知銜
珠蛇豈省去去好將雛林間娛暮景

周牖如太夫人冰鶴圖

皚皚堅冰凝翬翬鶴羽舒戔戔螺峰高下有賢母
廬賢母吾家秀曰嬪周氏間入室相夫子上堂奉
老姑朝汲夜中績黽勉供有無盡道新婦賢嫁來

十載餘云何天降割夫子壯歲徂奄忽就泉路况
與母氏俱是時盛疾疫十室九爲墟阿母遣婢問
入戶仆不蘇坐起一小樓孀孀寡與孤生與死爲
鄰洎血泉已枯拮据舉兩喪手口哀卒瘞首無美
釵飾身無兼衣襦牀無莞簟安飢無升斗儲鼠齧
蟲所蝕惟有架上書課兒勤誦讀一粥過日晡屋
後數畝園瓦礫塞滿塗斬刈分菜畦十指親糞除
朝來抱甕灌日暮行荷鋤妾心甘如薺妾命苦如
荼豆莢淚垂垂瓜瓠血濡濡剪韭勿傷根拔葵勿
裂膚種芋以爲飯種菰以爲蔬餘將出門賣以爲

燈火需母謂兒知否汝父齋志終汝今不讀書爲
商或爲農何以見汝父九泉難相逢室中熒熒燈
是母手所營身上單布衣是母手所縫口中脫粟
飯是母手所舂縱兒恐兒廢扶兒恐兒傷嗶兒起
中夜坐兒紡車旁母織兒讀書軋軋聲琅琅月黑
漏三下有盜行徐徐伏垣伺人倦穿穴窺室隅聞
聲母驚起手刃當窗噉我家何所有孃孃寡與孤
首無美釵飾身無兼衣襦牀無莞簟安飢無升斗
儲鼠齧蟲所蝕惟有架上書不堪汝攜去疾走無
躊躇盜聞失聲走不敢窺戶樞東鄰有老媪媪子

遠行賈子婦臨當產擁被在牀臥夜有聲相驚家
不戒於火四鄰聲譁沸譁震屋瓦媼急挈婦走
望門求寄舍倉皇哭且訴里中無留者母起白伯
氏開門聽之留共有鄉里情況以急相投舍之爲
不義但住無所愁割我半領席分我半間廬媼行
牽婦息忽聞聲呱呱婦喜媼下拜感母憐我家不
爾婦與孫棄死中路衢逐賊一何勇救鄰一何仁
皇天不相負安得長苦辛兒長善讀書卓犖富篇
章二十中副車三十舉於鄉五年成進士筮仕淇
之陽腰懸大尹印綰以墨青綬張蓋乘肩輿吏卒

呵殿走奉母到官所跽迎大道口母顧謂我兒汝
身受國恩教汝一卷書償我七品官勿忘舊日苦
園蔬易朝餐勿作貪墨吏瘠民以自肥勿作鞭扑
吏殘民以自威兒跽再拜謝朝夕行無違淇當通
路間直北上 神京西走陝甘川南走滇黔荆車
馬日供頓早夜勞逢迎將軍檄買馬買馬歸化城
取道縣西郭縣民間皆驚是時九月中田禾尙棲
畝千百馬爲羣取禾作芻藁村民手白挺大器驅
馬走東村連西落壯兒將健婦腰鑣截馬尾吏不
敢開口鄰有一少年翩翩事遊冶日暮騎歸來言

過野田下吏窺少年富可以任馬價指名誣大吏
官符火急下兒跪請阿母斯人實無罪便欲相救
取大吏須置對兒欲棄此官竊恐爲母悔母聞艱
然怒兒言太欺謾救汝百姓命奪汝七品官孰得
孰爲失教汝胡爲然大吏况賢明但去勿留難白
日光昭昭終照覆盆冤兒行白大吏况獲雪少年
村民共驚歎涕下如洑瀾府吏下縣來虎威許狐
假捉人繫馬頸鞭箠交亂下填門衆人看馳驅生
叱咤縣令得聞之槌鼓升堂皇鼠子何敢爾三尺
存王章鎖項頓其首驅之使來前大杖予二十可

憐無完臂繫之行報府具以白府君府君初聞之
盛怒面發頰有此強項令不使我相聞鞠躬前致
詞下吏白府君朝廷縣家堂此非令私門令知三
尺法不復知何人府君聞此言同嘆便作喜令知
守三尺我言毋乃鄙卻後相扶持共作民父母作
令六七載煦煦事拊循白事無受笞催租無叩門
嬉遊及老幼安穩到雞豚積勞因致疾謝事歸故
園解我大尹印脫我墨青綬肩輿奉阿母兒親扶
且走百姓皆驚搶無路得借冠裂布作繡旗漉酒
盛瓦盆纍纍堆果核霍霍向雞豚齊會大道口膜

拜泣且言匪由父母賢實感大母恩何緣舍我去
祝壽羅酒樽阿母見大喜對衆停肩輿重勞汝百
姓送我登長途住此六七年有益百姓無來時此
行李去時猶故吾首無美釵飾身無兼衣襦牀無
莞簟安甌無升斗儲持此謝百姓或不爲罪歟幼
者穉負至老者行杖扶健兒攘其臂少婦行相呼
遠送十里外絮泣語喁喁兒行念母教終身守斯
須乃召良畫師寫此冰鶴圖圖中何所有冠帶美
翩翩顏愉貌儼恪奉母臨前軒前軒有深池池冰
結淪漣白鶴時飛來刷羽皓且鮮冰以喻母節鶴

以祝母年題詩多瓊瑤累紙復連編我括列女傳
附以循吏篇

指痛

中年氣血衰百病一身托偏頭風方熾拇指痛復
作搐掣時不寧信訕勢難數漸牽一臂酸遙制四
體縛肘間舊頑癰痛癢兩無著將母血瘀轆或恐
筋攣縮疾痛真害事無眠聽宵柝天地一指耳構
此幻軀殼我爲指自訟兼以誌予忤世人矜高名
巨擘聲卓犖汝於五指間處短恒退卻世人重厚
利子母歸掌握汝於多金來清晝不敢攫不能挽

五石佩鞮引弓繳不能飲一斗舉酒近杯杓禪不
拈花笑勇不徒手搏但解挾匕箸粗糲麤淡泊時
或執不律文詞雜腐弱以茲汝告勞休汝則勿藥
讓人心自甘豈獨指弗若何須露一爪並欲填六
鑿

徐令 某照

徐侯老甲科卅載猶作縣賢聲播畿赤遠譽度驪
冉竭來丹徒宰口碑滿京峴地衝神逾間官貧政
加善手版朝送迎紅燭夜聽斷清暇問甿俗江天
遂凌眊發源送入海宦游蹟已徧舉杯欲酌波無

乃發三歎道旁停騏驎羈遲傍江岸南船北使馬
得地才乃見遂令千里足不及一壺擅低頭斲野
草伏櫪壯心健清時重卓魯終見台司踐君行不
久滯得士需亟薦請看圖中人霜髭已如練

陶經初易太守東井品泉圖

爲學有如井吾聞山下泉以果行育德蒙養聖功
全爲政有如井吾聞木上水以勞民勸相養而不
窮矣爲學與爲政二者交相得惟其有原泉是以
大潤澤卓哉經初君治學兩高等造士取諸蒙養
民取諸井萬山圍平州中有絃誦區其東有新井

桐陰牽轆轤使君手所鑿時來停雙驂文翁教蜀
化歐陽飲滁甘圖中貌瀟灑去後思鬱紆但有井
水處如聞父母呼五年坐淮陰江淮河所匯豈惟
一井潤萬派流益大曾聞東坡言如水在地中更
當瀉大海內君千古胷

陶節母嗣孤守節詩

聖賢精義學最大在倫理五常天胚胎一本性生
死世衰真意湮人各私其子孝愛克交盡感通無
殊軌由來刺絕裾何必非離裏使孫不如子無祖
但有彌薄孝厚於慈坊民言孔旨推此骨肉情擴

恩餘堂輯稿

卷三

七

以任卹媼女鬻母不瞑萬物同一體卓哉陶母賢
巾幘存天紀仁至義復盡萬古永不毀松肪與芋
火苦節恒有此我歌惟無文扶植意有以

胡雲坡

季堂

廉使爲嫂請 貤封淑人詩

學爲

帝者師德與後人種光山我父執杖履不及捧卽
其一家教足令四海頌芳蘭門先折梁木楹繼夢
持家聽啼烏當戶餘小鳳爾時君子澤斷續千鈞
重小郎屬新婦事往有餘慟謝朗流涕牽元明隔
紗誦情深昌黎依禮篤馬援奉慈且濟以嚴仁更

賴其勇處能讀父書出果爲世用望並鼎鉉崇誠
藉牘囊貢

天高能聽卑不以令甲壅豈惟蟻情鑒足爲糝俗
諷戛羹幾不俟市米乃終訟牛脯言再三龍牽事
閼闢古者且多譏後來益交洵幾人堦簞聲變以
琴瑟弄門衰釁一室勢盛遺羣從請看甘淑人鸞
封賁高冢

題友人

某照

梅花得春先如人方求志陽和盎然足中受萬物
備桃花得春盛如人行義時雨露二三月光風開

熙怡化工真大鈞百昌到次第雪霜含甲坼穠華
有根蒂偉哉仙骨人坐擁等身書飛香滿襟袖落
英紛庭除識公少年日謂於梅寄意爲詠君家詩
卽問和羹未見公仕宦早春風桃始華東皇賜顏
色萬井繁桑麻畫史亦狡獪詩人旣離奇風開露
井夜雪擁孤山時听然但微笑圖中之鬚眉草木
同臭味如何有差池我爲下轉語是二還是一願
言鹽梅調直到蟠桃實

辛卯典江南秋試揭曉後袁子才枚前輩
以詩見贈依韻奉畱

文章各是非可信者其理以法爲體幹如身頂放
趾以古爲血脈如祖宗孫子其下乃逞詞色俾而
稱揣相者多舉肥難作詎易視竭來典秋試未飲
上池水徒思鍼癥結敢曰洞骨髓區區執管見清
虛去渣滓炮燂雜太羹箏琶亂清徵拔十古得五
我今竟能幾不謂勞先生擊節情弗已使人意也
消如已得之喜夙昔慕先生仰止誠久矣涓流趨
大瀛土圭測穹晷於今始自信嚮往非阿比寸心
本同源如水以水洗相知木鑽槃一見桶脫庑隨
園秋色老芙蓉爛紅綺來侍雪階程初御龍門李

知我氣不怯席間以劍擬倒篋出武庫示我文盈
咫尺入口飲醇醉涉目播糠眯卒讀心犁然穢枉歎
觀止韓蘇聽黜陟王楊供驅使惟當勸先生蚤速
付之梓毋俾天下人風聞食以耳傳布大江南捷
等臂使指書讀各萬徧手牋口復哆皆學先生文
文心長不死我憑以取士徵債操券紙吾門有二
妙追陪學文史從公登高呼咸使望風靡戲爲學
步吟敬代請益起

寄鄭楓人太守求甌甘三十韻

化枳遷攷工包柚任禹貢乳甘本同類土宜炎州

種甌江圻東南地勢越閩控連峯浴波立鉅海際
天涌此物得水氣潛滋相爲用矮樹綠差差初實
青總總乍結一丸搓漸大兩手捧晚成欲堅好閱
颶風暴凍外團黃金彈中走白玉永分瓣房剖蠟
裹肌棉敷蛹嫩芽翻雞冠甘液捋馬湮冷浸肝脾
交香留拈爪縫裹橙等曹鄔衢橋難伯仲地道泥
山擅物產唐書扛梅溪險韻吟郁離託說諷邦人
狀草木不比屈子頌我乘使者車再越石門洞江
心寺在望館頭渡可恐青黃綴籬角點破海天霧
永嘉山水郡猶入他鄉夢雖無細布裹頗用青箬

寵擔愁頰發肩裝慮底脫桶百夫煩輦運比戶勞
栽壠食之心如水中民疾痛君真康成孫官與
靈運共交味蔗境倒別緒藕絲動涪翁百顆求頴
濱三寸送胸無冰炭交品以風霜重懷人或託物
契濶愁心中木瓜投詩筍梅花隨驛鞚

上元日晨雨

一夜鐙月輝五更雷雨薄初看掣虵電纔及下魚
鑰火樹濕生烟星橋泥沒屨兒童慣作劇鐙市數
錢博糊紙象魚蝦戲罷置院落凌晨亟起視黃篋
以繩縛昨宵六陌喧叢祠燒煜燭珠屏卮字轉繡

築五采錯火繖引龍行獅子與兔搏沿街婦嫗走
填巷嬰稚樂斗大縣家城風景頗不惡吳俗好浮
華乘興爭踴躍大小費雖殊奢靡勢相若今年春
候早冒櫛氣磅礴先期雷發聲驚汝事東作抑聞
啟蟄前農占理可度四十九日雲春水生漠漠農占
驚蟄先鳴雷四十九日雲不聞上元越十日始驚蟄老夫搔頭慮多雨爲農
虐須臾大光明朝曦射屋角熅火照田蠶今朝更
燠灼

壽李右海明府五十

西江老翰林舊推三尊宿萬彭兩驂靳臨川一機

軸詩筆奇共賞學行砥交勗心常投漆膠跡不隔
飛伏兩家羣子弟異姓講敦睦序如鴻鴈聯姻或
朱陳續李五後來雋軒鶴雞羣獨少日侍吟壇秀
句附篇幅何媿趨庭賢乃擇坦牀腹卅年孝廉船
五十縣令祿掀髯發一噓百歲齊眉足我生且更
晚不及諸父躅視君十年長髮已霜雪覆情親無
諛言侑觴賡一曲家傳清白久學優聞見熟室有
佐廉婦牛衣曾挽鹿古人重五十官政乃可服東
海有高門魯國多善俗庭前三爵晉宇下萬人祝
長生在愛民相報以遐福

椒雞

北庖鐵雀常南膳椒雞乍我游狼五山節近歲八
蜡海風歛颭颭江蘊滌穠稷有鳥水氣中何人火
攻下幻匪蜃蛤變蘋與鷓鴣亞鍛翅翮不豐褐羽
衣少姪託命椒爲生問名雞可借三香善服氣五
德拙司夜落實目鬪鸛過草齋結廬絕糧鷓柏冬
趁食燕應社來乘海門潮集傍沙戶舍披棉匹鵲
鯨見彈果鴉炙列單壓恒饌入市競高價晶鹽搗
以芼雪酒沃初酢爛頂形剝芡辭骨味啖蔗橙芍
調何須薑桂質未謝餘馨到指爪臙馥留齒罅如

人飽詩書竟體得韞藉物生各有性其天不容假
竹實鵲避嚇桑椹鳩遭罵鵲食菱以名鵲得瓜乃
化紅豆啄者鸚半夏甘自鷗是物生本遠以食禍
自嫁忽改稻梁謀不避刀机貲祝雞飽有時煮椒
殺無赦終然同雉斟胡弗逐鵬駕石銜精衛苦樂
享爰居怕舊巢寂自安海天遙可跨聊隨草木食
不向網罟逐安美人間遊焉能免彈射

馬頭

張灣達馬頭一舍經宿昔行行船掉尾隱隱沙露
脊初枕梯難上橫限闕爲隔蕩如失水鮒退作遇

風鶴牽挽百丈斷邪許十夫力通路一勺多勢以
曲取逆不然建瓴下一瀉絕涓滴阻淺雖告勞蓄
水乃其德我聞津門東海河一關隔夏秋壅成漲
霜降始暢適又聞雲梯關眠亘馬可策下滯上必
濫流緩淤更積南北兩海口皆以沙爲賊小大形
固異利害地相易方哆談龍口又踏磨驢跡扁舟
不能前紙上言何益

順風自武城至臨清

津北苦閘淺津南苦汴流况復日間作趙趙多石
尤問程八百里三十日夷猶塊然篷底臥有如被

拘囚壯志馬脫絡歸心鷹繫韉今晨推窗望旗腳
忽南投翩翩疾去隼泛泛吹輕鷗隄樹壓舷側岸
塵隨柁樓眠篙坐不起拖縴行且謳但聞汨瀟聲
船頭蹴浮漚午過武城縣暮近臨清州衛河礙多
曲風力不得週不然浮江湖一昔千里修鬱久差
足快半日經一郵心閒坐談好謂客君知不呂望
困鼓刀八十封營邱早貴後失勢客去魏其侯子
雲甘寂寞草元後世求任沈名齊梁浮豔至唐休
疲驚十駕遠神駿一蹶留鵠飛有退日螻屈爲信
謀造物各有時達觀無不侔遲速步蛾子憂喜心

蜉蝣速亦不足喜遲亦不足憂不見阻風坐遄行
南來舟

糧艘 并序

少讀曝書亭集有糧艘詩謂舟大費浩
而遲遲重困丁力宜撤而小之心遽其
說嘗舉似清江楊勤恪公大以爲不然
指畫事體達於政宜於民方知書生之
見隘矣公總漕十有五年河湖南北數
千里間七省舟楫之民至今言之泣下
牘行日遇糧艘觸憶遺語隳括成詩

令甲凡漕舟舟載七百石所受未及半枵然尙餘
力或言元海運道易舟未易官有歲修費水有地
形格夫有干指勞軍有終歲役何如陋其規取足
容正額章句紙上談老成胸中畫由來國家事體
大物不迫始謀僅麤給末路更蹙偏轉漕連七省
營造如一式或亂江漢流或浮彭蠡澤敢以天庾
供輕涉波臣國歲葺政之經官帑豈靳惜彼苟有
所利不辭稍附益材大用可久質薄朽必亟胡爲
憚補苴而乃勇變革平江達通路數千里南北置
牐時蓄縮設夫日爬剔都爲運道謀行旅蒙其德

苟爲易浮送漸恐成淤塞牽挽集百夫其面有菜
色憐民不耕稼貧人雜盜賊千舟十萬衆仰此以
衣食一朝忽奪之誰歟非黔赤荆襄伐竹木三吳
出布帛西江擅陶埏兩浙供蠶織微或販酒醯下
至羅履屐日用飲食間爲物頗繁賾商固便附載
軍亦資餽直懋遷有無通彼此均樂得屯田業久
虛僉運費孔劇一物不能容終歲何所獲市冷物
價昂運艱商利窄豈惟軍告病四民被其厄變法
匪易易利害必什伯大官媿媿嫻嫻矜儒流尅覈指
掌言疊疊傾耳心默默事往一日夢人遙九京隔

安得如斯人盡布中外職

謁分水龍王廟夜登前山望遠

漳衛去已遙
河湖來未達
路入東郡頭
運道恒苦渴
五汶挾沈出
泉脈醞活活
衆流會於阿
其勢亦寢濶
敲殘水晶盤
壁破青玉玦
橫穿山脇漏
半拊水頭奪
劃開犀角攪
分掉魚尾潑
三岸靜無聲
平鋪不拘掇
誰爲司其權
下有蒼龍穴
我舟從北來
薄暮此打楫
船脣順流趨
舵尾逆波遏
一手以物投
萍踪兩隔絕
人言有石脊
能於閭中割
俯眎不可見
但覺彼此活
古廟當其衝
靈旗漾漂灑
門前

岸崔崔庭下碑鬱鬱虛堂窗陰沉沉乃暮色闕再
進祀神禹九拜躬磬折但除昏墊惠明德至今烈
當年無此地智巧亦不屑從來求水利害至伊自
掇出門聊喚渡艣聲幾鴉軋遂登前山望對峙若
伊闕深黑路漸上牽衣知蘿葛趾滑頭承尻相戒
語木末稍平皆雜坐半已牆影埒東汶西眺湖白
氣互開豁近瞰兩山間蛇走一線雪不辨南北歧
了識縱橫列風高寒侵衣露冷塵浣韞安得新月
湧解使宿雲撥須臾廟鐘鳴隔水度叢樾

晚泊

晨發界首驛北風船頭起十夫挽不前過午更披
靡三十里日行晚泊傍孤壘自我從遠遊於今將
兩紀耳目亦已熟六七經過此其流日以濁其勢
日以駛土人爲予言倒灌濁黃水石水五斗泥每
過輒淤底底高水彌上隄崇田愈阨安得大疏爬
水活沙不死旁有一老言河故道堯濟溯禹四千
年漸南二千里奪泗汴及淮駸駸勢未已袁浦距
瓜步十舍餘無幾更後或千載不合江不止數往
逆知來計數迂當理長慮雖憂天適言可測蠡

舟阻豬婆灘

舟徒六朝鎮廿里方到縣其下豬婆灘與江隔一
岸是時冬令深水淺纔沒胛凍泥龜兆坵濕土牛
涔泣決決田間渠泠泠石際泚胎鰕淵可察涸鮒
轍欲斷牖高塹不通江落引難灌計袤丈幾千測
廣尋僅半千艘填其間邪許聲相亂百家邑俄成
一閭市未散半篙刺不下百丈牽互綰祇虞柁挂
艫安得杙維纜連雞飛膈膊退鷁影胡旋魚同失
水憂甓有觸藩患喧闐車轂擊跣踣馬索習小艇
懼排壓大舸益留難陸地盪無力泥行櫂斯善去
之謝未能來者積無算長年抵足眠大估搔首悶

路長行不得塗窮計思變瀕水百貨積沿隄萬夫
汗相將負且乘相逐奔而殿兜子酬盈千束擔僦
論貫吁嗟倦游人船唇坐愁看

天橋灣圖

歐陽思潁水東坡說江源宦遊望鄉國古人有同
然君家喬木居鬱然傍左輔計里中由旬城東通
石路云胡勞悵望遣興畫滄洲盈盈潞一水宛宛
橋兩頭綠楊窳地垂高檣連岸起問津客不知中
有十萬里放棹倏拴舟曾弗淹晷刻不聞邪許聲
但費一驢力雞犬皆識門親串若對字况君有蘭

陔相隨在柏府君言天一涯卽在春明外遠近平
等觀孰分須彌芥我聞忽太息悠然動鄉愁南隔
河淮江彭蠡阻且修視君孰爲意什伯天橋灣掩
展莫讀畫君才方少年

種竹二十韻

堂北兩弓隙計以數竿補付質珠百八論直縉十
五呀喘課跛奚揮汗走鬻圖載畚除劫灰碾輪昇
淨土方罌田一稜蜿蜒漣四禦運篴黃布地汲鹹
白潑乳頰眉百檐泉側耳三更雨始獲叢梢碧漸
覺菜蠹舉風低搶檐頭月落影釵股尙難定枯苑

先已劇勞苦遙憶江鄉南籬落入平楚連林地不
擇引蔓多莫數行鞭冬雪埋脫籜春風煦一錢筍
盈束三餐香透釜生非灌溉力家少種植譜鉅堪
中椽寬細或編籃管其材不勝用終老赦斤斧所
居無俗人欲看莫問主物惟弗能遷土宜各有取
乃知介直節祇合邱壑處

裘少司農以所作遊碧雲寺詩進呈蒙

恩賜和並令恭和

御製香山近詩敬依原韻一首

香山靜宜敝

御園春風二月晴光暄

天子順時下清蹕侍臣啟事羅高軒紅泉碧嶂山水窟得從仗外來躋援園北二里碧雲寺春明夢餘錄可翻朱鋪文卮數十級倚山高下繚以垣當年客過說泉勝祇今流水聲猶喧名猶昔名境昔境淨土別啟清淨門九霄香界日月側三世諸佛人天尊萬象臚列儼飭餽諸峯拱揖排兒孫罨檐有松徑有竹檐以辛夷櫺以蓀耶律捨宅于公寺往時塵跡如雲昏豈知山靈忽榮幸去天尺五仰可捫清遠堂前入對罷挈遊退食踰朝

瞰入門佳興欲快絕階前癭柳久已髡試泉悅性
想

清暇筠鑪靜瀉波潏潏暫來身已到天上援筆得
句清且溫首登

聖製附末簡長江大河向若奔錄成進
御霑雨露溥溥白葉滋流根

新詩排籤促次韻

賜和且復成長言咎繇賡載虞史紀召穆矢音大
雅存詎如今者遇冠絕一吟一咏叨

深恩文章靜緣知仁契下士未許窺其樊如之鈞

天聽廣樂記遊不比花柳村

明良遇合乃有此豈惟藝苑傳毋謾

讀弇州史料書成祖事

周公以兵輔孺子盡勝朝賢作奸究瓜蔓連抄及
親族教坊配入半生死弇州山人存舊案嗟乎豈
復有人理手移帝祚起諸王千秋一字心難忘建
文未死猶有主乃以誅戮威四方有明一代弊政
兩北司鎮撫東西廠誰是當年作俑人祇爲區區
滅奸黨出關誘執寧王權欲絕後顧招朶顏事成
不惜割地謝大寧城界燕山遷盡棄藩籬失犄角

浪言天子來守邊譬如兄弟鬪堂戶借資盜賊襲
牆垣京師七舍邊城逼外兵數擾都門側後來流
賊山西來卻向居庸入京國明祚傾於永樂年亂
亡禍敗匪由天仁廟寬仁幸繼體不然沙邱榆木
川

萬平川以詩屬訂黠畢卻寄時宿王家營
清和十日稽山道烏篷七尺張孤帆君來送我縣
西郭驅珠出手詩開緘別君荒雞正膠角菰蒲深
暗波酣酣舟輿三易客心倦到及落景高峯銜淩
晨風便縱行棹浹日直達吳閫南虎邱草樹排隱

隱金山樓觀雄眈眈涉江踰淮渡河北四瀆十日
經其三把君詩卷坐篷底快讀百過舌本甘叫絕
忽驚狎鷗起微哦相雜柔櫓恬武林九驛入百里
北至邗上君所諳真詩真境一對勘妙象刻露窮
雕鐫君於作詩有深嗜高才快筆能兩兼神仙已
化三食蠹拙繅太急入繭蠶丹黃乃復借拙手口
雖能言心則慚我評忍爲酷吏酷君詩多比貪夫
貪蛟螭莫使蚯蚓雜杞梓要令樗櫟芟瓊瑤什襲
付急腳明日刼刼動征驂寄詩藉口報仲氏客子

計日排郵籤

戴箕圃

第元

與子易居用田山薑移居圖

韻作詩並兩郎屬和錄以見示疊韻奉禽
入受一廛出一車閒官到處堪爲家羈愁不耐閉
籠鳥野性終在穿林麋頻年擾擾營屋舍如燕啄
泥蜂排衙一枝可託兩家易借車載具塵街斜掃
壁君留舊題字繞砌我有先栽花高枝低樹莫分
別與君本是同巢鴉門巷相格保安寺晨鐘聞撞
暮鼓過不知今昔孰賓主萬物逆旅從義媧
南榮冬暝翻日車先生襤被新移家捆載圖書雞
與犬提挈兒女麋隨麋僮奴三兩守門戶也似山

縣開朝衙風門土炕勞位置齏餅米甕堆橫斜最愛南園一丈地明年可種春頭花先生於中日兀坐直聽晨鵲到昏鴉知君摒擋亦不易佳句忽送門頻過老鳳聲清更雛鳳參差吹徹匏笙媧

黃金滿簾穀滿車不如讀書子克家旁觀見獵亦心喜快似射雉兼呼麇兩郎聞詩蘭陔側乃翁退食柏府衙舊居我塋三丈壁定見灑墨紛敲斜囑君培植俟其實灼灼莫作春園花我詩吟成遣子讀紙筆但足供塗鴉淵明雍端昌黎昶徑欲掩戶還自撾有子賢愚掛懷抱引絙無奈搏土媧

橋亭卜卦硯歌

并序

弋陽謝文節公當宋德祐末兵敗信州
走建陽以此硯賣卜於朝天橋明永樂
間橋崩得硯上有程鉅夫銘詞今在查
恂叔

禮

太守處

其修九寸博半尺其厚不及寸斑斑土花蝕云是
朝天橋上亭賣卜簾前淚和墨一聲白鴈江南飛
三日潮頭招不得更無趙家半塊土唯有先生一
片石崖山風雨已十年臣心不轉如石堅從容就
義誠匪易疊山後死文山先百年橋崩硯始出四

百年來傳勿失太平太守好事者對客摸抄恒永
日留將玉帶生並垂石不能言觀者悲當年病餓
憫忠寺壁間太息曹娥碑

法源寺看海棠用東坡定惠院海棠韻同

劉紉秋

芬

王抑莊

恕曾

姚雪門

頤

仲兄九

弟

門前百尺剝竿木倚天高閣歸然獨寺留唐代劇
壯觀僧走緇塵半凡俗海棠時節耐清遊豈必名
花在幽谷一株獨立閣外墀兩株離立香積屋鐘
魚粥鼓日靜對果然寧可食無肉長廊轉出紺殿

門其旁。郢畦十弓足。丁香幾樹相間發。皓雪鑊向
春情淑。千盆穉菊蒿芽短。穿篲清泉注。腐腹高低
紅白各異態。惜哉但少三竿竹。客笑而言君太癡。
萬紫千紅皆可目。神仙富貴那能兼。是謂得隲而
望蜀。茲花霏豔壓衆卉。風裏亭亭儼翔鵠。若使移
來小軒下。日飲無何歌一曲。便應不負此春時。俯
仰春愁忽相觸。

我家澹岡翳喬木。山中長鑱勵黃獨。豆苗青青油
菜黃。縱使無花差。不俗竭來作客鳥。辭林漫說當
官鶯。出谷開時咫尺不得看。打頭日坐三間屋。兀

然返覺遜枯禪祇礙周妻與何肉今朝乘暇到花
前三匝逡巡興難足花雖謝去枝未空春欲歸時
氣猶淑深紅淺絳太狼藉日翻蝶翅果蠶腹蒂懸
疑落秋後英葉抽似解春頭竹鴻泥忽憶三載前
詩客來遊爭指日子雲長病羅含去磨鏡人空向
西蜀

前年楊黹堂前輩徐曉窗同年羅臺山孝廉
同遊以詩屬和今臺山已歸瑞金曉窗作令

雙流昨
歲下世

但有殘詩留壁端好語一一皆中鵠眼前

美景易生感茲遊便作雍門曲由來佛說須忘情
色香臭味都不觸

臭味差池區草木有香應讓昌州獨雖然顏色豔

爭春未免繁華姿近俗花中亦有冒名者秋來草
本叢生谷長安富兒頗解嗜幾樹賴紅栽繞屋高
燒銀燭照深夜醉舞華茵厭梁肉我輩甘從寂寞
遊古寺借觀心已足弟兄合并有夙因朋舊追隨
况多淑劉郎短小萬夫氣王郎紛綸五經腹姚君
後進筆生花阿兄拙宦符解竹有來同車花同看
合以性情非耳目異鄉但得長如此此間樂更不
思蜀有弟吟詩作臥游譬彼奕者心鴻鵠東坡當
年定惠院子由未奏同工曲詩成三疊鼓五通倦
僕屏風頭屢觸

豐臺登高分韻得客字

高柳半黃枯蓼白衆葉霜乾聲瑟瑟一枝兩枝倚
餘妍階前剩菊已如客人言花事盛豐臺看到秋
光尋不得重陽喜未阻風雨招邀聯袂蠟遊屐
車陌上碾驢磨孤寺林間露鳴脊輸錢花戶供蜜
課載酒遊人樂禪寂露濃月白不知寒夢醒清鐘
動鄰壁今年曾款法源寺海棠飽看春狼藉祇今
一瞥到九秋荷枯桂綻猶厯厯人生俛仰盡如此
花謝花開總陳迹莫言菊後少芳菲馬塍人家事
花役牡丹作葢水仙芽又向雪中弄春色

畫馬

杜陵馬詩歷千古天育驃騎安西驄後來老坡能
角立刻畫馬性馴且雄二子去後此詩絕日走千
里疇追蹤高堂蕭梢柳絲颭其下三騎嘶長風對
之閣筆幾閱月烏闌界就吟難工昨聞邊臣遠入
告大宛貢馬西來東谷量色別不勝計屯田吏士
騎乘充餘將分配內營伍千驍萬匹皆如龍貳師
鑄金求始得作歌薦廟勞鼓鐘區區唐宋講馬政
南山沙苑芻粟空豈如
聖化被無極牧場外廐包崑濛詩成紀盛古未有

彼哉二子所遇窮太息王良伯樂死遐想天寶開
元中

仲兄屬周豫源

立本

作三馬小幅意有所

寄疊韻一首以廣之

鹽車上坂不待駿款段代步如乘驄但被金鞍銜
玉勒蹢躅一過咸稱雄豈知老驥方伏櫪絕塵意
氣奔無蹤人生得失安足定達者視若牛馬風卽
如此馬空見畫兀然誰識行步工當年與君備上
駟馳燕弛越日尙東棧中葭豆似山積塲苗塲藿
恒不充一朝散放柳陰下不秣不步如癡龍蹄間

風入憶戰鼓脊端露冷愁霜鐘自嗟筋骨猶未老
人道德力都成空惟有荒林翳野草長條踈地雲
濛濛何時按圖索神駿此馬奮迅寧終窮千金可
市九方顧須在天閑十二中

秋林覓句圖

第二泉邊三載住蠟屐未到山前路始知行腳是
勞人卻愧填胸無好句君亦東西南北遊竹鑑茶
鼎空塵浮漫將筆底三尺絹寫出懷中一段秋宋
玉離騷歐陽賦高人慣與秋心訴晁君得句發春
妍灑向圖間千萬樹

張侍御

敦均

贈藏書十種賦謝

虞山夙稱文獻地縣中富有藏書家絳雲高樓未
炬日萬卷插架堆亂麻遵王敏求記一帙子晉汲
古鐫五車後來銷歇漸散佚楚弓楚得應非遐侍
御書淫更古癖填胸經籍所取奢一門兄弟相師
友青緇世學籤抽牙贈我十書半秘本快甚如得
背癢爬窮日瀏覽未一過嬾不卒讀空容嗟受書
敢避無厭請買菜求益肥市瓜方今

右文輯四庫蓬山延閣蒸雲霞海內奇籍爭上獻
官裏賜書羣拜嘉翰林國子郎官署下逮草澤分

光華

朝廷待君向歆輩此去焜耀柏府衙期君搜剔盡
幽隱嫋嬛宛委窮皇媧

揚州留別門人陶湘

人生富貴一呷耳一寸光陰千萬里絕裾祇解作
身謀捧檄何關爲親喜我持使節江南來抽盡春
蠶五千紙就中陶子真明珠覓之辛苦泥沙底獨
抱遺經棄傳說猶工射策窮原委殿後寧辭鼂戴
山挂名幸得魚燒尾曹劉沈謝閭中摸末學晚生
難到此果然後凋知松栢肯與新進同桃李諸生

祭酒無前輩大官著錄或弟子讀書多比夾漈鄭
鑑古精越襄陽米住在懷寧顧曲堂樹石無塵淨
如洗燕子春燈舊狎邪雞聲夜火今圖史課兒六
歲識方數奉母九旬具甘旨舍南舍北翁嫗言六
十嬰兒能有幾三年留滯我江介杖策挈舟頻至
止情親師弟子爲恭誼視友朋吾以齒送別邗江
百里遙黯然銷魂而已矣問君不肯上春官眷戀
庭幃供滌瀟杏花消息春寂寞慈竹平安天尺咫
勸餐動是半年違索乳何曾一日已我有慈母七
十餘路遠河冰艱動履行逢臘雪去遲遲迎待春

波生瀾瀾因君孝慕心專壹牽我別離情徙倚始
知出處至性關五色斑衣勝青紫

題顧端文公鄉試第一闈卷遺蹟

理學一糟粕文章百芻靈何況儻來問區區艷科
名卓哉端文公東林其始興扶持士氣正撐拄國
運傾末流未必盡君子要與崔魏馬阮爭制義取
人空言耳矧復弱冠誇一鳴異時成就遽爾許殘
煤斷楮至今昭日星秦淮河上秋風生我昔其地
曾持衡古人得士乃如此安得金鑑一刮雙眼明
徵雪事分得道韞咏絮

謝家庭院真清絕有美一人獨超越高節人稱林
下風俊才自咏庭中雪魏晉間人工語言體物瀏
亮多秘妍爲問撒鹽向空際何如飛絮臨風前後
來作者紛多變鷺鷥黎梅銀玉練巧者師意誇形
容拙者偷詞事點竄杜陵評詩貴清新昌黎作文
言戒陳東坡議論極變態作詩必此非詩人未若
柳絮因風起千古低頭一女子六一居士空前人
聚星堂前吟禁體

題畫分得瀛洲學士圖

何人寫作瀛洲圖前有立本後公麟文采風流各

生面簪裾劍佩皆傳神當年城西文學館十八人
尤被高選太原公子天人姿奔走羣材羅琰琬良
謀杜斷佐命勲下及倉曹妙簡掄惜哉同畫不同
傳許善心兒列姦臣有客披圖起三歎衆賢一佞
能致亂我言用材須器使安得永徽似貞觀帝邱
作邑濟瀆洞咸陽築城昆明灰胸中萬卷馬前對
雍容文翰真奇材惜哉不作學士死乃令監國佐
太子用違其器釁乃生十斛麥易平章事俊人末
路鮮克終能駕馭者真英雄凌烟功臣徐世勣瀛
洲學士許敬宗

黃葯林驛畫蠟梅水仙天竺子爲小三友

圖

春華秋實各有時庶子家丞競相勝朔風吹雪一夜寒盡掃華實歸清淨就中傑榦獨挺奇三友歲寒然後知抑爲本性抑善養物自爲之天爲之豈知造物無盡藏別有貞姿藹相向鱗不之而箭不筠氣不南枝各無恙柔條小草託種殊著華結實紛芳萼詎爲幽齋媚岑寂居然春色來畫圖人言老大見介節少年美好易爲缺但使質殊凡草木自然能傲嚴霜雪賦形大小真無憑化工於物何

愛憎彼此氣類總相取後生亦有君子朋老樹無
花空自好我已心如科上槁題詩寄語後來人各
有本心毋草草

洪禮吉

告遊揚州和蔣清容

士銓

見贈舊

韻卻寄兼呈袁春圃

鑑

以硯爲田耕以筆失得隨人歲凶吉男兒貧賤慎
所因莫假俗流生羽翼洪生投試款我門甲乙肯
附榜末孫手持半滅一紙字主人罷去留書存使
者階前幾尺地吐盡胸中千古意落筆根源篆籀
文滿懷填塞娜嬛記哦詩作作更有芒寧失不工

句必彊殘脂剩粉此間病得之足令氣激昂畫地
作餅寧可煮何人下士知其苦我嫌令甲不敢留
食汝安得乾淨土袁二標格今無儔意氣鍼芥知
相求必能爲汝讀書供此士詎比錐刀流作詩代
簡蔣夫子介紹其間自君始兩君不能致一客故
人可以三歎起

晦按禮吉稚存
先生原名也

爲錢竹初

維喬

題其先兄文敏公畫卷

錢三輟講款我戶手一幀畫咨涕洟尙書遺墨忽
到眼卷長二丈紛橫披圖窮有詩未及寫追書作
跋神合離如此兄弟古今少子由吾友子瞻師我

無真賞堪讀畫但感宿昔成吁噉

乾清朶殿在天上綠窗朱戶金朶恩儒臣載筆近
尺五尙書曳履承

恩暉詩成畫竟

天一咲不讀萬卷安能斯二十餘載清切地後進
聯步空瞠而蓬萊畫長無一事曲牀侍側湘簾垂
有詩共吟畫旁看指示妙處心神怡公於愛才自
天性散樗惡櫟顧弗遺謂我詩法有翁徑縱不佳
者各有宜斷槍折戟較利鈍亂頭麤服分妍媸我
聞輒慙不敢受公之此語則可思正法眼藏真妙

諦彼何人哉工粉脂論詩斷斷絕世態於畫或以
一貫之卷端紀歲在丙戌越年我始遊彤墀是時
諸老方鼎盛出入倬直恒相隨五年我持使者節
公亦讀禮星南馳撰杖請衽僅一再精神遽化騎
尾箕文定文達湍相繼老成凋謝纔週朞古人知
已重一語爲天下戚哀予私公初寫此不及見見
畫公已不可追何須更著弁陽錄過眼頓作雲烟
飛

錢竹初以詩餉蘭依韻畱之

新年已過謝來客檢點寒氈舊吟席落燈三日雨

淫淫衆草窗前顏甚澤忽然吹我墮空山晴烘香
滿何山巔新詩一首花四盎揚葩吐氣增鮮妍吟
情昔作孤山侶君舊作梅花詩極工化工肖物無閒土筆端
花事年年開徑欲爲君譜詩譜滿堂美人予自成
媚人不在國香名盈門桃李胡爲爾入室芝蘭空
復情我抱孤懷同小草當年獨有蘭昆曉謂文敏師卽
今採芳欲貽誰遠復遠兮西州道攀條太息泣且
吟平生師友鍾情深虎賁似人羊曇慟矧乃同枝
結素心

研山圖詩

摩挲三尺碑刻劃一片石三十六峯頭古翠如欲
滴翠巒玉筍窪復隆嵌穴上與龍池通問誰巧匠
劉山骨當年研北依重瞳金尊花柳歌聲歇澄心
堂紙昇元帖君王吮墨揮小詞侍女薰香書梵夾
浮橋采石穿天塹無限關山君不見勾當江南公
事回此間日夕淚洗面飄零此石落人間攜來海
嶽供雲烟低頭丈人合下拜返袖博士真成顛刷
字題銘憑問訊電痕龍恠森成陣人弓人得石無
言不歸巨唐歸寶晉富貴文章草頭露猶向叢談
論典故苔蘚蘚駁圖又昏矮屋殘趺橫北固萬里

江水來峨岷三山京口摩蒼雲如此江山生眼底
一卷邱壑何足云我聞佛觀泯大小甘露寺前鐘
破曉大鹹水海須彌山都向金剛六如了

瀆流

天津之南瀆流口海潮子午來汨汨人言此下爲
逆河九河到此合爲一爾雅釋詁瀆者獨流俗相
傳或猶實逆河義取海相迎灌納自然寧有術水
於天地乃血脉此吸彼呼非異物譬如有人飲千
斛自口達腹無少窒其中假道在咽喉飲所從入
氣從出未聞氣出或礙飲但覺飲多氣不鬱卽看

龕赭潮逆上萬頃漸江去洞涵明德既遠四千年
水之爲患匪今日潮不刷泥泥緩淤海不受河河
橫溢口腹之間有物存氣壅滯積生百疾九河故
道介滄景地志諸家多載筆蔡氏書傳始傳疑碣
石已淪難致詰未審此土是耶非但評茲理得與
失

度德州浮橋

昔年觸暑向南發夏雨淫淫泥滑滑前年北來雪
塞塗馬毛蝟縮僕裂膚今年舟行春二月顛風三
日吹不歇汴流欲上不得上尺寸之間坂九折人

生信有行路難陰晴風雨都相干船唇驢背味久
飽今來別是含辛酸一帶朱欄橫畧約津吏開船
趨唯諾晨烏返哺噪樹頭風聲河聲皆作惡六年
三度往還頻前番猶是膝前身乘傳出持使者節
追鋒歸曳侍臣紳一樣長塗難再得手線身衣忽
無色不知南北此通津多少省親迎養客橋外白
衣前執手半是江南舊儕偶可憐曾向道邊逢動
說登堂先拜母

阿城牖大風用東坡十月十六日記所見
韻

千里迴望天拖黃鎔金盪永搖斜陽但覺觸鼻皆
土氣須臾四塞無晶光宿麥五寸壓欲沒官柳兩
岸吹成僵收船倉卒幸早計深恐一失不及防漁
舟簸去舞濕網茅屋捲盡森堵墻晦冥不辨隔瀟
寺暮鐘想像來虛廊不雨而雷響終夜上下搜索
如捕亡牯間水飛與石鬬噴薄起立投空塘波聲
人聲聞相雜直到虛白生吉祥天明風定船亦發
水平清淺堪濫觴

馬中齋清江楊勤懋所薦士也公沒後言
輒流涕存卹其家甚備相遇江上感成以

贈

馬侯關西將氣可壓萬人翻然服儒雅緩帶何恂
恂闔閭城外雨揚子江上春三年一相見面目久
更真向我未言先悅恨軍門昔作千夫長鞭刀誰
識棟梁材匣劍已被風塵賞薦之

天子言其賢於今專閭官九遷記得當年大星墜
布衾繒帳囊無錢洛陽部曲趨帷闥目中清節逢
人說苦憑廟食寫遺思泣勸諸孫念先烈我亦曾
慚國士知九京可作吾誰歸男兒遇合必有報大
臣薦剡原無私幾人欲哭西州路薄俗芳型今一

遇勗哉努力爲

國家卽是恩門不忘處

朱佩旭明府所藏仇實父白描羅漢

十洲慣傳著色畫洗盡朱綠獨標清淨緣寫作渡
海阿羅漢筆所未到天水相吐吞惇筋鎖骨相具
足或袒雙乳或露兩臂或拖長眉或聳肩或騎或
步或擔行殿後香具坐具一錫所荷無弗全水田
袈裟青錦襴曹衣吳帶濤風翻摘驪龍頷跋虎背
水獸不可名狀不辨牛馬蛟鼉鼉四十八部手持
口且誦一百八珠指掐心同圓鉢中有飯無飯飽

扇底是風非風喧囂巾冠笠禿而鬚前者回顧隨
者相後先已無眼耳口鼻意何以獨開生面一一
神俱完我聞內典羅漢歷幾劫過阿斯舍阿祇洹
得成應真本十六初到佛地同入不二門其後益
以降龍伏虎尊者爲十八廣爲二十更益文殊與
普賢此之所圖符其數乃至蜀中造像遂有五百
尊淨慈靈隱兩寺今所塑神通狡獪變幻難具言
佛門廣大盡接引七寶蓮華座下大衆來喧闐有
如一官坐聽事興臺廉從門內門外紛黃延一心
念彼遂墮落但當照以慧眼運以定力一棒一喝

都瞿然朱侯循吏愛奇古觀此會心別具不在四
果之垂禪

方正學先生遺墨

其人已去五百載獨有其書在其書復不傳臨本
然乎然覆巢之下無完卵俞氏余氏憑展轉矧茲
藏者其族人溯自宋分支派遠乃知秉彝之好人
有情若滅若沒觀於此者其心油然而生日星河嶽
無論見者與不見耿耿正氣函元精我曾拜公祠
再讀遺文嚮往之掩卷蒼茫有真意不在區區數
行字

廣賀方回彭城三詠卽用其韻

并序

賀方回彭城三詠當時會者六人分題各賦今
惟慶湖遺老集存而五人者所詠不可復考矣
予按試徐州以此題校士輒檢郡志比事屬辭
得三詠者凡五匪敢夸多鬪捷亦聊以補前人
之佚夫徐古所稱形勢區也嬴劉角於前曹呂
噬於後南北宋魏之際邊陲相界所必爭也今
其遺踪故壘蕩然已無復存而山川雄偉俯仰
憑弔之間如或遇之撮其大者與方回所詠競
勝矣

厭氣臺

大王屈雌伏四海罷雄戰
皇帝坐咸陽天威走雷
電函谷關門四扇開千
乘萬騎從西來立石頌德
鳴得意何爲更築百尺臺
當年防此區區者銷鋒
鑄鐘金鑄馬失計欲仗泥
一丸空與山川增鬱盤
若使天子果有氣殺一亭
長夫何難豈知縱觀方
太息匹夫他日爲縣官
吁嗟乎東遊未已更南牧
鑿斷秦淮春水綠

呂布固

君不見千里青青草
不長匹夫去就如翻掌
卓蹶

瞞興漢賊同黷然王氣消芒碭彭城已屠下邳懼
築城高高呂梁路豈知入金作魚遊妄說當關逞
狼顧三版不沒沂泗來滿城魚鼈吁可哀白門樓
高急乃下人中呂布胡爲哉一從天子移都許今
日域中誰是主何須藉汝將騎爲乞憐俯首眞狐
鼠羞看坐上大耳兒留得劉家一塊土

石佛山

南朝世界空樓臺長淮以北隨蒿萊朝發平城夕
瓜步佛狸馬飲江水來請婚結好遙歃血歸來十
萬羣車轍胡鹽五種牲百牢城主殷勤話將別兩

旬北旆欲還鄉鐫佛鑿字誌不忘阿彌陀佛大如
斗當年鐵錐神飛揚無腳之寇雖易取猶能割據
天一方吁嗟乎豫章降北侯景至臺城天子埋頭
藏

古人之蹟以文傳過其地者歌詠之論系之羶
薌後來豈不以其文哉桓魋石柳事見於經子
房受書圯上老人史遷列於傳而後人於坡公
桓山題名留侯論諸篇恒流連不置若黃樓旣
自爲詩又屬弟轍與少游爲之賦汲汲焉若藉
是以傳者甚矣古人之迂也三者事不相繫比

類詠之以文合焉

桓山

荒邱暮雨寒宰樹秋風戰誰爲百年人千古一夢
電桓魋石槲不可開枯腊但有野火來不見祖龍
驪山下水銀鳧雁飛泉臺漢家孝文眞達者生惜
露臺千里馬霸陵松栢長九九不共金人泣露盤
魋也何愚聖所歎死去翻恨速朽難祇今山名僅
假姓已無碑刻司馬官吁嗟乎豈惟牛羊縱芻牧
冢上彈琴杯泛綠

圯上

兩手扶成碭郡長蹙項安劉易反掌初心祇有橫
陽君安知天子生芒碭奮身一擊何所懼天崩地
坼無歸路君亡於義不旋踵弟死何心更回顧丈
夫慷慨生本來爲龍爲魚君莫哀不能奮椎何足
道徒爾進履安用哉東坡作論吾未許子房大節
在故主又言項籍失輕用君不見鴻門一劍徒首
鼠一決肯作博浪椎安得鴻溝以東皆漢土

黃樓

彭城城南臨高臺頃刻萬井成汗萊澶淵直下濁
流灌黃河之水天上來老龍餐膏蛟吮血汴泗交

恩餘堂輯稿

卷三

四

流迷故轍朝親舂鋤暮洗泥忍令民作無家別渾
消漲落歸其鄉明年重九未能忘高樓落成賓從
宴羽衣吹笛聲清揚豈惟文章誇勝絕保障千載
懷此方噫吁噉有才如此用不究蠻烟瘴海終身
藏

山川風物之感一往情深帝王而心鄉井仕宦
而艷田間聚散而篤兄弟其致一也讀大風歌
朱陳村詩逍遙堂唱和之作乃亦不知情生於
文乎抑文生於情乎

粉榆社

劉季歸故鄉生產事百戰萬歲樂思沛魂魄逝飛
電家家舊社粉榆開帝王今作遊子來四海爲家
家在此起舞慷慨歌風臺誰言太上忘情者長安
不見風牛馬中陽一別迅雙丸漢中關中路百盤
不如與仲田間老猶勝而翁俎上難借問沛中父
老宴三日何似未央前殿朝千官君不見雞犬來
歸知舊牧新豐社樹依然綠

朱陳村

雞犬桑麻共生長到門十畝平如掌宋時已道不
如唐豐外那知還有碭生小不識風波懼邨前便

是天涯路田燈社酒成一家竹馬鳩車笑相顧買
紅纏缸互往來不須嫁娶啼聲哀生作邨民死邨
土百年歲月長悠哉桃花源更在何許空有父子
無賓主豈如仙境自人間饑叱隴牛飽倉鼠便欲
移家向邨住此邦信美非吾土

逍遙臺

宦遊一別梁王臺渺不可卽如蓬萊離心輾轉杭
密去會面殷勤澶濮來暫會還離泣成血四海平
生惟弟轍逍遙臺後木千尋冷風吹雨聲聲別乍
疑卅角同故鄉對牀舊約心難忘摩挲銅狄三生

石強作解語闕不揚憂患柏臺詩兩首生死僭海水一方兄弟因緣那多得作賦千載黃樓藏地以人重忠臣烈女高人逸士前徽未沫足以警動奮發摩世礪俗匪獨此邦之光也歌詠不衰差勝流連景物云爾

龔勝墓

索璽幃闔間奪之以不戰居然擬周公金縢大雷電黃帝符命金匱開四十萬人勸進來身是漢家老病守不拜新朝受禪臺三老官屬迎使者束帛安車駕駟馬人生百歲坂走九朝來不用羅杯盤

旦暮入地安事此老夫饑死非所難它年得傍首
陽塚慚愧書莽太子師友祭酒官君不聞故人名
高動九牧沛國兩唐綬皆綠

燕子樓

徐州僕射東方長千里河山歸指掌朝擁牙旗閃
淮泗晝驅獵騎遮芒碭忽隨鬼伯啼聲懼白楊作
柱邛山路辛苦教將歌舞成拋卻如花不相顧高
樓惟有燕子來綠窗朱戶中含哀台觀牀空長已
矣霓裳曲冷安在哉幾回未忍輕相許全死偷生
心自主賤妾不敢化鴛鴦舍人漫擬同雀鼠生憎

好色石季倫贏得樓前美人作黃土

放鶴亭

窪者池沼高者臺須臾變滅烟草萊雲龍孤亭一
笠耳鶴亦一去不復來春山糴黛秋林血祇今想
見伊人轍讀書樂志奉老親莫教鶴怨輕相別玉
局仙人守此鄉世外結契形骸忘吟詩作記白門
道豈惟隱逸高名揚標舉慈孝厚風俗董召南事
差足方見坡詩不然山林放曠世恒有焉用好鶴好
酒屑屑分行藏

誌輿地者類多附會彭城爲古大彭國而因以

有樓有宅有井且列老彭於仙釋誣矣若春秋之徐在今泗州而茲地有季札挂劍臺漢梁國在睢陽因碭爲梁乃以燕喜亭爲梁王平臺輶轉沿襲不可以不辨亦詩人餘事也

彭祖井

彭殤物本齊若與陰陽戰至人視八百如露復如電彭城古國堯所開四千餘年鼎鼎來中間廢興互移徙頽城圯堞荒池臺何處更尋養生者世人戀此一野馬井中大藥乞一丸高樓舊宅輶轡盤仙乎仙乎直妄耳信而好古子所難容成御女益

邪說滅性敗行戕五官怪矣乎安得比肩堯時十
二牧歷虞夏商髣猶綠

挂劍臺

誌家附會空增長千里輿圖紋在掌徐君國在大
徐城朱沛莫將移沛碣生憐死捐非所懼來時上
國經過路行子不言心默許故人未請色先顧投
縞繒紆還歸來墓門宿草生深哀世間地下心不
隔千金之劍何有哉徐人歌之遽如許緇衣好賢
誰適主入井下石彼何人聞風足以愧狗鼠天下
直道同此心何必此疆彼界非茲土

燕喜亭

鬱鬱梁苑連繁臺睢陽舊蹟成荒萊當年孝王盛
賓客授簡作賦鄒枚來匕首已餐袁盎血自蹈淮
南覆車轍免園文士竟何爲詭勝空教成泣別茲
來碭郡非其鄉胡爲傳會若不忘豈如池上清秋
夜謫仙詩句高才揚文章流傳亦偶爾古今彼此
無定方我歌掃摺空瑣瑣安望金石名山藏

錢稼軒畫傳文忠公三捷圖

蒼然萬疊巖峯削雲開洗出芙蓉鏐峽間流水度
懸橋崖際雄關紆棧閣畫圖遠勢論萬里聯騎飛

來如尺咫紅旗快閃暮山青巒色巖姿皆送喜千
軍筆掃天邊路靖捲塵埃歛烟霧憑看眼底生風
雲那復草間穴狐兔高堂懸出生光輝佳音報日
春風歸歸來細說銘勲地幾處山川入指揮

北宋石經書後

赤腳仙人下當宁韓范富歐名世輔是時海寓多
父安文治張皇垂掌故寫經鐫石立汴都判者宋
祁及王洙下遴草澤上皇姪趙楊張謝章與胡一
行小篆一行隸貴以古文存古意點畫猶講說文
書體裁不襲經生字豈意於今六百年十三版耳

僅留傳小長蘆叟季野氏二三策未見周官法帖
譜系蘭亭考好事羶薌競揆討書家但解八法工
俗學安知六經寶一從大盜壅河流難向黃河沙
底求獨怪當年刻甫畢便行新法廢春秋

集書消寒詩卷戲柬馬叔安

廣泰

光卿

袖卷頗得趣不可無君詩拉雜三兩首但與歲寒
期更得一筆畫相與點染之憶讀君詩卅載初雪
片如掌孤山孤不須魚羹宋五嫂但賞高唱蘄王
湖上騎驢圖

送韓城太傅告歸和大興相國韻四首

我讀戴記儒行崇環堵之室一畝官去亦不得爲
勇退留亦不得爲匪躬適留未是戀棧馬適去未
是避弋鴻陳力就列不能止老農務穡隨歉豐臣
身不繫爭進退臣道何敢言汗隆方今

神聖致平治全定隴蜀汚漢潼江湖魏闕可自効
相與努力揚

皇風留者勿謂去者拙去者勿謂留者工旁觀軒
輊別有意議論轆轤非其公不如靜待二三策此
時且各行吾衷

洪河北潤華比崇樓臺無地先人官少年親炙兩

賢相

尹文端
陳文恭

後來視昔於其躬暮猶頽濱師和仲

老有德曜賓梁鴻買車賣宅自茲去兼貨狐白貂
裘豐嚴氣正性有不可面頰鼻縮聲隆隆五科著
錄滿天下不私祿籍如梓橦十年秉樞作宰相廣
文先生仍舊風狀元及第士素艷自謂詩拙札不
工讀書所得近思錄論兵惟舉韓文公名臣言行
撮其大謂予不信皦日衷

初定拔萃科制崇君與我偕貢澤宮豈知功臣貌
褒鄂豈知舊學尊榮躬我先君立門外鵠君先我
奮雲中鴻辰朝同直酉同退小飲舉觴大舉豐順

城米市不半里驢車過從牽殷隆金經祝

聖夾寫竺字書千祿碑繙潼交承每連左右手遷
次輒拜上下風兒登南宮孫京兆策名再幸依宗
工近年衰病亦相似以跛御跛兩習公有過誰爲
予藥石有疑誰爲予折衷

杖朝八十禮所崇給扶矧乃

詔入宮觀者賢哉或竊歎榮壓五等桓信躬危持
顛扶取類大用舍行藏樹義鴻飾鳩祝汝哽噎廢
荷篠勤我禾黍豐一條柳栗三尺耳臣今得此
君恩隆歸山幸有濟勝具暇或選勝登華潼撰履

執末鄉後輩爲道優老求舊風不然孔光亦靈壽
嬾嬰徒見行步工不足舉以爲公頌卽此

賜杖責備公輔之翼之使自得敬思

放勲憂民衷